

30. april 2015

Naalackersuinikkut arlaannaannulluunniit attuumassuteqanngitsunik siunnersuisoqatigiinnik pilersitseqqullugit Naalackersuisut peqquneqarnissaannik Inatsisartut aalajangiiffigissasattut siunnersuut. Siunnersuisooqatigiit aatsitassarsiornermi aningaasaliisartut sanngisuussusiat aningaasaliissussarsiornermullu pilersaarutaat pillugit inassuteqaasiortassapput, pilersaarutit aalajangersimasut sanngisuussusiat pillugu paasissutissiisassallutik kiisalu aatsitassarsiornermi pilersaarutit ataasiakkaat siunissaq ungasinnerusoq eqqarsaatigalugu piujuartitsineq tunngavigalugu inuiaqatigiinni ineriartortitsinermik nassataqarnissaat siuarsaaqataaffigissallugu. Tamanna pillugu siunnersuisoqatigiit Naalackersuisunut innuttaasunullu inassuteqaasiortassapput.

(Inatsisartunut ilaasortat Naaja H. Nathanielsen aamma Sara Olsvig, Inuit Ataqatigiit)

Inuit Ataqatigiit sinnerlugit Inatsisartuni ilaasortat Naaja H. Nathanielsen aamma Sara Olsvig kingumut siunnersuuteqaqqipput aatsitassarsiornerup iluani Naalackersuinikkut arlaannaannulluunniit attuumassuteqanngitsunik siunnersuisoqatigiinnik pilersitseqqullugit Naalackersuisut peqquneqassasut. Tamannalu Siumumiit oqaaseqarfigissavarput.

Siumup anguniarpaa aatsitassarsiornermi ingerlatsinerit tamarmik avatangiiseq, peqqissuseq, pinngortitaq, pisuussutillu uummassusillit mianeralugit ingerlanneqassasut.

Inuiaqatigiittut aningaasarsiornikkut imminut napatissaagut, tassanilu aatsitassarsiorneq inuusutissarsiutit sukarsuisa ilaattut siuariartornermut suliffinnillu pilersitsinermut toqqammaveqarnissarput Siumumiit tunngaviumik isumagaarput.

Aatsitassarsiornermi suliassaqarfimmi akisussaaffik nunatsinnit tiguneqarmat inuiaqatigiittut nalorninaatumik aammalu erseqqissumik aatsitassarsiornermik ingerlatsisunut ingerlatsiniartunullu inatsisitigut qaffasissumik piumasaqaateqarfiusumik inatsisiliorntsigtut malitassaqartinneqarput.

Siumumiit isumaqarpugut aatsitassarsiornermi atugassarititaasut pitsaanerpaajusariaqartut, nunatta aatsitassarsiornikkut aningaasaliiffigineqartarnera orniginartooqqullugu.

Aalajangiiffigissassamik siunnersuuteqartut matumani siunertarisaat tassaasoq siunnersuisoqatigiit pilersinneqassagunik aatsitassarsiornermi aningaasaliisartut sanngisuussusiat aningaasaliissussarsiornermullu pilersaarutaat pillugit inassuteqaasiortassanerannik oqariartuut Siumumiit isumakulunnartikkatsigu matumani oqaatigissavarput. Inuiaqatigiinnimi pisariaqartitarput tassaavoq aatsitassarsiornermi periarfissat pitsaasut aningaasaliiffigissallugillu orniginartut, soorunami avatangiiseq, peqqissuseq, pinngortitaq pisuussutillu uummassusillit mianerinneqqissaarnerannik toqqammavillit.

Taamaamat Siumumimiit Siunnersuisoqatigiit Naalackersuinikkut arlaannaannulluunniit attuumassuteqanngitsut pilersinneqarnissaannut isuma tapersersorninnaangilarput aatsitassarsiornerup ineriartortinneqarnissaa patajaatsoq inuiaqatigiinni pisariaqarteqisarput pitsaanerpaamik qulakkeerumallugu.

Taamaattorli Naalackersuisooqatigiinnermi isumaqatigiissummi ima allassimasoqarpoq: ”*Nunani tamalaaneersunit inuttaqartumik aatsitassarsiorneq pillugu siunnersuisooqatigiinnik Naalackersuisooqatigiit pilersitsinissaq suliarissallugu isumaqatigiissutigaat*”¹. Tassanilu Siumumiit isumarput naapertorlugu orniginartuutipparput immikkut ilisimasalinnik nunanit tamalaaneersunik siunnersuisooqatigiinnik pilersitsinissaq, taamaalilluni ilisimasat aallaavigalugit aatsitassarsiornerup ineriartortinneqarnissaa tungavissinneqassammat.

Siumumiit taamatut naatsumik oqaaseqarluta aalajangiiffigisassatut siunnersuutip massuma itigartitsissutigineqarnissaa inassutigaarput.

Anders Olsen, Siumut

¹ Naalakesuisooqatigiinnermut isumaqatigiissut – Qinigaaffik 2014-2018, qupp. 9